

諸暨縣志

6817
:8



諸暨縣志

卷二十一

人物

劉邵人物有志其理甚微而元而囊括流畧概以
人物題目之知人者以目正耳不知人者以耳敗
目尚慎旃哉將以述往事思來者斯亦譽不三周
未必信是也夫志猶史也史才難到吾暨自近古
以來如所稱一國之雋一州之第以及出尤之良
往往而有謹以徵文於古徵獻於今事必核實例
寧從嚴庶善善之中警訓存焉一以示勸一以示

懲志人物

名臣 人物一

嗟嗟臣工策名委質允懷不忘賚予良弼我思古人
名臣輩出風紀憲綱柱天指日列名臣傳第一

宋

姚憲

嘉泰會稽志字令則父舜明仕至徽猷閣待

制憲以父任補承務郎歷知臨安府仁和縣車駕
駐蹕臨安仁和為赤縣事尤煩劇憲資性敏強日
未晡吏已散去獄久無繫囚秩滿監進奏院知秀

州土豪錢國安居大澤中舍匿亡命為奸盜州縣
莫敢詰憲至擒國安及其支黨窮治置於法州里
遂安浙西大水蘇常為甚憲請輸粟萬斛以賑之
上嘉其能以直秘閣知平江府時羣盜出沒海道
為居民害捕弗獲朝命專以屬憲不數月悉擒之
進直敷文閣知臨安府歷工部侍郎進御史中丞
遷叅知政事以端明殿學士知江陵府卒江陵前
帥頗厲威嚴治盜不少貸憲繼其後嘗謂客曰故
帥得賊輒殺不復窮竟僕至獲盜必付之有司在

法當誅者初未輒貸一人而羣盜已稍出矣僕平居雖雛卵不敢妄殺今寧以疲輓不勝任去安忍濫及無辜哉人以此益推其長者

謹按姚憲籍係嶧人辨詳憲父舜明傳載武功

元

王良 元史本傳王良字止善尚氣節務明理以致用不苟事言說累辟江浙省掾吏會復立諸市舶司良從省官至泉州建言買舊有之船付舶商則費省而工易集且可杜官吏括克弊中書省如其

言凡為船六艘省官錢五十餘萬繕歷建德縣除兩浙運鹽司經歷紹興路總管上克敬以郡中計口授鹽民困於誅求乞減鹽五千引運使弗從及克敬為轉運使首議減紹興引額衆謂成籍不可改良毅然曰民實寡而強賦多民之錢今死徙已衆矣顧重改民籍而捨民命乎且浙右諸郡商賈輻輳未嘗以口計也始定議歲減食鹽五千六百引遷漕運萬戶府經歷紹興官糧入海運者十萬石城距海十八里歲拘民船備短送及至海

次主運者不即受多致耗缺良曰運戶既有官賦之直何復為是紛擾乃責其自載糧入運船船為風所敗者例覈實除其數良取吏牘披閱即除積糧五萬三千石鈔二百五十萬緡選檢校江浙有詣中書訟松江富民匿湖田沙蕩為糧一百七十餘萬石鈔五百餘萬緡宜設官追取遣良驗視至松江反覆以破其誣謂言者不過欲竦朝廷之聽而報宿怨且冀創立衙門為徼名爵計萬一民心動搖患生不測豈國家培養根本之策事遂寢除江西行省左右司員外郎安福有小吏誣民包隱田租九千餘石前後株連至千家數遣官按問無實有司尚喜事復勒民報合徵糧六百餘石良言是州之糧比原額已增豈復有欺隱詭寄者行省用良言悉蠲之在任歲餘以淮東道副使致仕

明

呂升 萬歷紹興府志法武中鄉貢典教溧陽以薦擢江西僉事號有風裁永樂戊子改山西境多虎患升為檄告神虎即就捕以憂去後補福建僉事

按部至建寧螟害稼升仰天祝之雷雨驟作螟盡
 死宣德初遷大理少卿與修永樂大典兩為會試
 同考所舉皆一時名士年七十致仕至九十二卒
 謹按呂升本籍山陰隆慶駱志云父文著來徙又
 載有世科坊在西塢為呂升呂公愿呂詵立其時
 相去不遠知之故悉非假
 異縣之人而引以為榮也

王鈺

萬歷紹興府志字孟堅號葵軒幼聰慧日記

數千言及長益博綜經史永樂壬辰進士以殿試
 第三人及第歷官編修修撰奉旨清兵部武勳案
 牘累數萬紙鈺閱覽參駁數日盡畢宣德中同修

兩朝實錄書成以疾歸正統初起為江西提學僉
 事少師楊士奇薦之也鈺正身率物品藻嚴明大
 小各有造就長河洞岷聞其賢亦遣子入學考績
 至京顯者倨傲弗為禮即日引退安居田里以文
 翰自娛環堵蕭然無異寒士

翁溥

隆慶駱志字德宏嘉靖己丑進士初知太湖

縣徵入為吏科給事中大同軍殺主將廷議持疑
 抗言乞正法以定國是事寧功罪失當抗言請風
 力官覈實一大臣諛佞播弄擅愛憎抗言發其姦

狀落職為龍泉丞尋起歷廬陵知縣蘇州府同知
廣東僉事參議四川副使參政河南按察使湖廣
左右布政使悉盡心舉職恩威並濟在四川時以
平白蕃及都蠻功兩賜金綺後陞都察院右副都
御史巡按湖廣改江西值歲旱大饑議賑貸明年
又旱議蠲租驛傳供應屬富戶殊苦溥改議并諸
政務調停節省民獲更生弋陽王攝寧府事日構
洶洶疏請分管以平事權羣爭遂寔陞兵部右侍
郎尋轉左侍郎考滿以捷音陞俸者三賞金幣者
二陞南京刑部尚書卒於官勅賜祭葬謚榮靖溥
識敏而氣凝臨事井井尤嗜學工詩文所著有知
白堂稿

駱問禮 明史本傳嘉靖末進士歷南京刑科給事
中隆慶三年陳皇后移別宮問禮偕同官張應治
等上言皇后正位中闈即有疾豈宜移宮望亟返
坤寧毋使後世謂變禮自陛下始不報給事張齊
劾徐階為廷臣所排下獄削籍問禮獨言齊賊可
疑不當以糾彈大臣實其罪張居正請大閱問禮

謂非要務而請帝日親萬幾詳覽奏章未幾効誠
意伯劉世延福建巡撫涂澤民不職帝並留之帝
初納言官請將令諸政務悉面奏於便殿問禮遂
條上面奏事宜一言陛下躬攬萬幾宜酌用羣言
不執已見使可否予奪皆合天道則有獨斷之美
無自用之失二言陛下宜日居便殿使侍從官常
在左右非嚮晦不入宮闈則涵養薰陶自多裨益
三言內閣政事根本宜參用諸司無拘翰林則講
明義理通達政事皆得其人四言詔旨必由六科

諸司始得奉行脫有未當許封還執奏如六科不
封駁諸司失檢察者許御史糾彈五言頃詔書兩
下皆許諸人直言然所採納者除言官與一二次
臣外盡付所司而已宜益廣言路凡臣民章奏不
惟其人惟其言令匹夫皆得自効六言陛下臨朝
決事凡給事左右如傳旨接奏章之類宜用文武
侍從毋使中官參與則窺竊之漸無自而生七言
士習傾危稍或異同輒加排陷自今凡議國事惟
論是非不徇好惡衆人言未必得一人言未必非

則公論日明士氣可振公言政令之出宜在必行
 今所司題覆已報可者未見修舉因循玩愒習為
 故常陛下當明作於上敕諸臣奮勵於下以挽頽
 惰之風九言面奏之儀宜畧去繁文務求實用俾
 諸臣入而敷奏退而治事無或兩妨斯上下之交
 可久十言修撰編檢諸臣宜令更番入直密邇乘
 輿一切言動執簡侍書其耳目所不及者諸司或
 以月報或以季報令得隨時纂緝以垂勸戒疏奏
 帝不悅宦侍復從中構之謫楚雄知事明年吏部
 舉雜職官當選者問禮及御史楊松在舉中帝曰
 此兩人安得遽遷俟三年後議之萬歷初屢遷湖

廣副使卒明史藝文志駱問禮萬一樓集六十一

卷外集一卷

紹興府志問禮字績亭謫楚雄知事

垣張居正忌之遂轉楊州府推官遷南工部歷雲南參議福建湖廣副使復為言者所中乞致仕居二十年卒隆慶間纂修邑志姚江孫鑛謂其詳博精核有據

陳性學 紹興府志字遷冲生有異資七歲能文

性學七歲自聯書室刺股每登萬歷丁巳進士由懷介夜志杜門常抱惜陰心

行人試貴州道御史提督直隸學政衡文有特鑑

兩劾權相悍帥舉朝側目。卒中政府忌遷廣東僉
事陞山西參政。稅璫恣肆以危言折服。丁艱服闋
備兵榆東。遂乞歸。巡撫崔應騏薦以邊才。竟引疾
不出。性學服官二十餘載。敷歷中外。所在有最績。
著有西臺疏草。紫瑛山藏稿。光裕堂集。皆激昂多
文采。

駱方壘

公舉事實字爾玉號武懿給諫問禮孫也

天啟辛酉以詩經舉於鄉。壬戌中文震孟榜進士。
初任句容縣知縣。內艱起補南海。調臨晉。內陞工

部營繕司主事。時朝廷有買銅買硝等役。姦人冒
領國帑。其弊種種。暨邑尤甚。會京師大旱。上詔求
直言。方壘疏曰。臣謹備述欽賑以補聖聞之所不
逮。以救民寃之所莫伸。伏乞皇上立斬葛藤。以出
疾苦。以追天和。以來甘雨。事方今肥蠶肆虐。民不
聊生。我皇上減樂徹膳。側身修行。下罪己之詔。開
聞過之門。蒙頒諭云。嘉言讜論。闕切治理。朝廷實
所樂聞。目下有何缺失。着羣臣直言勿隱。以憑採
擇。舉行欽此。大哉王言。有不至上格彼蒼。捷注桑

林之澍者豈理也顧臣竊計之吏治之壞世風之
澆仰干之弊皇上之洞鑒已深縷指已悉即嘉言
謹論近如科臣章正宸詞臣黃道周諸疏皆言人
之所不言自上年原任工部侍郎劉宗周數次抗
疏皆侃侃正論溥天同慶並仰之如泰山北斗望
之猶景星卿雲乃宗周束身歸山之後便寥寥絕
响今二臣繼起而披忠瀝胆感慨時事真朝陽鳴
鳳也臣等更何言且臣何人斯亦謬欲以么麼瀆
聖聽耶第設鐸懸韜聖明業不擇人而有聞不告
臣心即為欺主臣何敢默默處此而不以人言所
未及臣知之甚者為皇上陳之自皇上有買銅買
硝等役給銀商人紛投採辦甚急務亦重務也乃
神奸赤棍乘機冒領帑貲而不肖司官婪其抽扣
分例遂朦朧溷給以致銀入私囊即任其花費比
公務難竣輒肆其株連始猶及同姓也繼則及異
姓矣始猶侵贓之人所扳也繼則被扳之人又復
轉板矣司差縣役雜畜如雨錢奴菜傭共遭其毒
以故有欠贓原止以萬計而統計民間波累有費

言... 卷三十一
踰二三倍而仍未得寧宇者以還官之數有限而
差役棍徒之貪詐無窮也臣目擊臣鄉有差役至
家值舉筋而一噎輒斃者有差役十餘乘轎馬登
門積至數十人而一飯破家者有寡婦苦守十餘
年差役到門計無所出不得已而失節嫁人將所
得財禮僅完差錢而贓銀仍未能完者至若鬻妻
賣子號泣之哀顛沛之狀筆難罄述人難枚舉此
皆民困之至隱至極而能上千天和者也夫皇上
明旨原止着同爨押追不許蔓延無辜乃部不奉

旨聽本犯

即行文追索日報日添誅求無已

縣亦不必奉

聽二三巨猾指使溷扯平民箠楚

桁楊無所不有於是畏奸棍甚於畏官司而所
納之貲或半公家半入私橐者有全付逝波而
官司并不與聞者此等詭弊藉皇上之帑銀為僉
人之利藪利歸宵小怨歸朝廷死不擇音銚而走
險大可患也伏乞皇上立斬葛藤照依原奉明旨
只着同爨取償而一應無干續板速勅該部行文
司縣盡行赦免以蘇民厄以謝天譴庶甘霖早降

而聖德無疆矣。臣且再有請為皇上加意得人宏收清望。邇來如程國祥、黃道周、章正宸等，或隆不次之擢，或優使過之典。至若劉宗周、陳子壯，皆一時厚望千古真品，未蒙顯拔，致野有遺良。皇上倘翻然解澤沛湛露之恩於二臣，有不至順人應天而肅時雨若者，臣不信也。仰惟聖明採擇施行，不勝激切待命之至。奉批奏內押追商欠不遵明旨，輒聽本犯妄報續扳株連無辜，併蠹棍乘機嚇詐，深為民害。著嚴行禁飭，違者指參重治。劉宗周等已經處分，駱方壘何復借端妄陳，殊屬偏謬。姑且不究，方壘復以臣鄉湯火已甚，欽賊不堪再被株連，正犯之骨髓已枯，無辜之膏脂已竭，伏乞聖明行追奸屬，衙蠹乘機婪詐多賊，以補未足賊額。事奏聞疏曰：臣鄉自棍徒冒領帑貲，買辦銅鉛，侵欺入己，比追索還官，輒妄扳無辜同姓異姓，並遭其害。識面隔面俱坐，守錢奴一被報名，門戶立破。賣菜傭併加恐嚇，練魂皆消。巨魁之肆惡尤甚矣。而乘機插入，從中漁利之家屬，周親濟惡尤

不可言奉公之比責已究矣而因事吸髓不翅虎噬之得後奸胥逞克更難枚舉是故所欠官銀原止萬計而民間之累實倍過之所報有名或止二三而私行之嚇詐每至無算如臣鄉通省共計欽贓五十餘件然未有如臣縣某甲某乙之為禍最烈也甲乙原皆赤棍二人家業俱蕩廢流落江湖已有日矣突於崇禎辛未年夤領戶部銀三萬兩買辦銅鉛以供鼓鑄而某甲遂將前銀大肆花費致缺一萬餘金某乙亦缺五千餘兩前銀無償因

妄報無干家屬親戚等數十家私自嚇詐數百家而犯屬某某串地棍某某等承行書手某差役某某等如豺狼鳥獍嚼骨剥膚以致筑筑小民鬻妻賣子活產喪家甚且殞身棄命見者慘目聞者傷心臣非係宗盟即閩姻婭不忍坐視於本年閏四月初九日具嘆乾已極一疏備述欽賊扳累之苦隨奉旨禁飭隨蒙戶部錢法吳侍郎詳聞臣縣之慘亦於奏報疏內略述情形奉有嚴諭咨行三院此正臣縣撥霧見天身遺重生之日也今查某乙

欠贓將及額而某甲除完過外恐不能全完公帑之物勢必取盈而後已第本犯產業既無可求親戚被害亦盡蕭索倘再株連不息而不設法措補地方必至釀亂有不可言者矣且如前所稱犯屬差役婪詐獲利不下數千金合屬小民俱割肉代償流離無告而若輩反得擁其肥厚享妻妾房產之樂是豈人情之所平國法之所可貸者哉除將犯屬某某與正犯某甲原係同爨復串地棍某某遍詐銀六百餘兩合行竟追不必開款瑣瀆宸嚴親屬某款蹟一年千餘金亦曾投送戶部錢法堂行查俱不敢再贅外臣謹臚列各衙蠹所得贓款伏乞勅下該部轉行撫按嚴究追補若有餘可充餉銀若不足臣鄉願將某甲未完贓銀派入合縣錢糧通縣與之代完免至貧富緊遭狼狽之苦此亦合縣所踴躍樂從者也伏乞嚴諭刑部承追衙門無許某甲故違明禁續報姓名亦無許承追司官不遵明旨聽信本犯所報溷行文在外仍開犯屬差役婪詐之門則聖德如天萬年長治不替矣

言暨鼎志 卷二十一 人物一
某甲某乙朋詐計贓六千七百三十一兩被害共六十七家款蹟繁多不載奉上批奸商侵帑扳良殊可痛惡已屢旨嚴飭這所奏某甲某乙等犯屬衙蠹通同串詐大干法紀着各撫按將本內有名各犯嚴提盡法究擬以抵侵贓不許骫絜此崇禎十年事事下邑人咸作詩以頌歡聲如雷甲乙不著其名以皆邑人故諱之存厚也方壘避人焚草疏多不傳二疏則至今載在口碑故特表而出之列為傳後方壘陞營繕司郎中轉太僕寺致仕

國朝

余縉 黃宗羲御史余公墓誌字仲紳號浣公幼即能文時傳奄人魏忠賢竊政縉擬為彈章霜威風厲見者已識有埋輪之志順治壬辰登進士第知封邱縣縣當兵火之後公私掃地赤立方塞決河賦役連滯縉盡捐煩文碎教與之休息是時民間最苦包荒一事先是流賊蔓延人戶逃亡棄地彌望

朝議募民開墾各設興屯道興屯廳以董之民初無

不樂從及其徵租反過於現在之熟田違民始願
耕者復荒郡縣既以此為考成競張虛數無所歸
著於是以荒地之糧攤於熟地民皆失業縉惕然
憂之會制臺繩武李公行部至封縉導李公至曠
野目覩其裸跣毛食李公為之疏亦五年六月四
聞始豁虛張之數而興屯之廳道皆裁封與延津接壤
郵置錯互於百里之外裹飯受役民甚苦之縉陳
情撫軍但使之協濟而已中州治行推縉為第一
入為山西道御史條對多見施行以終養告歸丁
內外艱服闋補河南道御史所上章奏不尚苛細
而關於

國家大事請撤三藩家口議復撫臣兵權諸疏格於
部議而止後乃知為金石之策也越帥橫暴稅民
受貨奴客跳梁觸情放慝越民蘊憤無所發洩縉
嚴文件數其罪惡越帥中廢鳧藻之音載謠人口
朱方且妄言禍福朝士多信其言者縉曰此妖人
耳於法當糾寧可助彼狂瀾乎方且終以猖狂坐
死已而復請告歸悠悠林下至於沒世甲寅之亂

山寇圍攻越城縉出其私財以佐城守寇睥睨而去用世之志退而不忘卒年七十有三浙江通志縉令封六載熟悉兩河形勢遂議引支河以分水勢築遙堤以衛民居均堡夫以防潰溢清灘地以業窮民禁採青以杜騷擾擢御史歷河南山西二道巡視長蘆鹽課嚴禁私販酌通融代銷之法寬老幼負擔之禁商民德之

予告歸杜門不出建宗祠捐置祀田學田敦倫睦族任恤好施為邦人矜式

馮勸

浙江通志字研發順治甲午舉人選桐鄉縣

教諭陞博白縣知縣會兵燹之餘土寇未靖有賴天錫唐朝奉者侵擾城邑勸守禦擒捕民賴以安內艱服闋補襄陵縣催科撫字咸得其宜時秦中饑流民載道勸設廠作粥以濟全活者甚衆擢山西道御史彭孫適馮屏山侍御傳襄陵鄰邑洪洞等以水利爭訟者六州縣趙宋時金人置分水碑為界既而黠者泯碑以擅其利訟獄繁興數百年無有決之者撫軍檄勸司其獄按視月餘得金人

廢碑於野寺悉其源委乃為裁度損益因時制宜
構爭始息太原鎮駐潞安所需軍食輸自本郡及
旁郡之近潞者後移駐平陽與潞相距數百里軍
食仍運自潞潞處山脊必資夫役驢騾一夫之載
一驢之負不能以石道紆費大悉派諸民豪滑乘
機舞弊大為民害謂之挖運勸入臺首疏其事蒙
允改就平陽歲省不貲澤潞等十七州縣民慶更生旋
又巡視北城監試山右其綜覈寬嚴皆宜年七十
致仕

論曰炳哉麟哉名聲施於無窮功烈著而不滅名
臣豈易易哉唐稱姚宋宋稱韓范庶其當之而不
愧然事關國史不僅邑乘之光矣今志所載若姚
樞密所在多政績其以不嗜殺為心又何厚也昔
羅大經論賢將獨推曹彬一人憲非其流亞歟王
宣慰名垂元史而列之庶官位固未顯張陽和輯
郡志稱其少以范文正公自命且曰元士論南人
之賢必推良為第一品斯定矣呂少卿載在明史
與金壇虞謙合傳雖書不甚悉其風裁有可約畧

見者王葵軒為江西提學僉事彼都人士有再世
夫子之稱殆天才也翁榮靖身列九卿或嫌其與
分宜相周旋不無遺行然當是時次相如徐存齋
肩隨十年曲忍不敢講鈞禮而卒能沉幾觀變以
成其事否則少形聲色察友交瘡非膏鈇鑕即編
烟瘴亦復於國奚裨以予讀毛西河王文成傳本
云門人相繼摠屬善類因記所知者其一曰翁溥
豈有親炙姚江之門而甘為容悅之臣哉必不然
矣駱給諫條上面奏有古諍臣之風奈為江陵所
阻不竟其用良可慨也陳方伯內外報最嶺南人
祀之名宦今口碑尚藉藉也而毛西河與周櫟園
書謂其名不見知於郡邑斯言過矣詩有之維桑
與梓必恭敬止讀駱武懿兩疏其遺澤於桑梓者
不已多乎余公為御史邑中人具道其疏劾越帥
事甚詳而浙江通志列之循吏第載其令封邑時
事為多及閱黃梨洲南雷文定得以校諸所聞者
不誣余公其遠矣哉馮御史晉令也挖運一疏始
終為晉此亦如富鄭公之於青州自謂過於中書

二十四考者列之名臣奚愧為沈椿齡

沈椿齡

沈椿齡

沈椿齡

沈椿齡

沈椿齡

沈椿齡

沈椿齡

沈椿齡

附名臣

宋

謝仲斌

舊志紹興戊辰進士故相深甫仲父也女

為孝宗皇后封仲斌為魏國公孫若穆任樞密院

編修女為理宗皇后封若穆為中山孝王由四明

徙居諸暨之迴隊

謹按宋史后妃傳孝宗后謝氏丹陽人幼孤鞠於

外家冒姓翟氏則非故相深甫仲父女理宗后謝

氏諱道清丞相深甫孫女帝當立后楊太后德深

甫有援立功特命選之則亦非謝仲斌孫若穆者

女謝后進封三代父魏王祖及曾祖景之皆魯王

則所云中山孝王及魏國公者亦非又考宋史謝

深甫傳則臨海人仲斌為其仲父疑亦臨海人非
 四明人且即迴隊祖之要亦未必土著為賢人也
 而舊志載之如此其志縉紳亦復載有謝仲斌
 斌及謝深甫諸人姑另錄之而附辨於此

國朝

湯聘

余文儀湯中丞傳字莘來號稼堂世居諸暨

之全堂後封公世煜徙居會城遂籍仁和領雍正

乙卯鄉薦丙辰成進士派吏部驗封司學習授考

功司主事歷員外郎中調文選司丁卯改陝西道

監察御史

瀛臺侍宴

賜上用表裏書籍箋絹果餅是秋充順天鄉試同考官

明年轉刑科掌印給事中巡視中城庚午充陝西

鄉試正考官奉

命提督江西學政任滿補湖南布政使丁外艱服闋授
江西布政使辛巳奉

旨巡撫湖北壬午改撫江西以湖北狗庇臬司沈作朋
失出歸州盜案解官湖北辦城工甲申授湖南按
察使明年遷西安布政使復陞湖北巡撫又明年
調撫雲南又明年調撫貴州以雲南緬匪擾邊督
臣失機坐不効解職還京師繫法曹以病卒年六
十有三聘官御史時嘗奏請貧民負販零鹽毋許

兵役阻索略云貧民挑鹽易米額有定數原不在
禁捕之例臣聞外省城鄉集鎮設有常捕私役基
布星羅遇大夥人強每多袖手一遇擔負數十斤
之貧民輒借名誣索甚或攘為已有此等貧民類
皆典貸為貧家有老羸屋多孩穉嗷嗷待哺而竟
絕食于惡捕之手非所以恤窮民廣生計也又云
各省濱水之鄉民多以漁為業費力不多獲貲無
算此天地自然之美利宜聽民自便毋任胥役借
端設禁奏上

上為惻然下部議可又請嚴富商困米當絲之令以足
民衣食奉

旨允行其他指切利害恫恤民隱類如此河流大決奉
命由徐州相度地勢開引河殺水勢奏績稱

旨擢外任歷官江西湖北最久若脩城垣清屯田恤親
獄設立常平倉教條法俱可垂久聘深於經史衡

文以雅贍為宗校閱京闈典試陝右視學江西所
收士如彭元瑞戴第元王士榮等皆以文學受

恩遇江右文風踵四家餘習頗病艱深聘力矯之翕然
丕變前後二十餘年秉銓政司文教膺疆寄清操

自勵卒之日家無尺土子克岐甫三歲

諸暨縣志

卷二

忠節人物二

自天作忠聿光往記其忠斯何其身能致維此哲
人鞠躬盡瘁捐軀成仁敵愾死義列忠節傳第二

宋

楊欽 舊志字子欽槩浦人授司法參軍佐武穆公

殉苑朱仙鎮淳祐十年上念其忠命遣督造塋墓

賜祭贈吳越路相

何雲 子嵩 浙江通志忠臣傳字仕龍德祐間北兵

言聖果志 卷二十二 人物二
至傾貲倡義築柵率鄉人抵禦不支與其子嵩並死於難

朱光 張軫 浙江通志忠臣傳字吉甫明經敦行元伯顏下江南遣裨將上官基招撫浙東至縣光與同邑張軫等率鄉民抵禦光被執口占曰生為大宋臣死為大宋鬼一片忠義心明月照秋水基怒以火燃之三日始絕軫亦不屈而死光嘗註西銘人多佩誦之

元

胡存道 一名善 耕錄胡善字師善泰定進士胡一中

高第弟子也至正乙未以憲僉趙公舉為松江儒學經師越明年二月苗寇至欲燬孔子廟善坐經席罵寇寇怒殺之廟得免於災先是善以死自許題詩於壁曰領檄來司教臨危要致身但圖存聖像不愧作儒臣及難死甚不誣今校官貌其像祀于先賢堂

明 始平人一新刊晉書卷之五十五

蔣文旭 毛奇齡孟貞女傳文旭年十七膺洪武二

十九年鄉貢授河南道監察御史性耿介與方孝孺遊重之作味菜軒記以贈名大起陳時政十二

事中有暱戚殺平人一條忤旨賜死浙江通志文

旭字公旦以論易儲忤旨賜死北面拜曰苟有裨

於國臣敢偷生上尋悟赦至無及方孝孺味菜軒記

姚長子兩浙名賢錄嘉靖乙卯倭自諸暨突入郡

境獲長子貫其肘使為導長子乃給之西而密呼

鄉人曰俟我過某橋若等亟撤之我引賊入絕地

可悉就擒我死不恨已而果陷于化人壇四面皆

水我兵絕其後賊知為所給殺長子剝其屍賊百

三十餘人乃盡殲於此鄉人立祠祀長子於苑所

傳日炯紹興府志字中黃邑諸生幼孤事母盡孝

師事劉戢山學以古人之自期流寇之變日炯慟哭

請母願自殉母許之遂赴湄池江而死祀郡城殉節祠載明

史見朱大典傳

傳商霖詩子有慈帟白髮親因來癡蠢謬譏人不知子立千秋節即是千秋孝養身

傳商霖公舉事實字天養一字思文與從季日炯

皆劉戢山門人性孝友母嗜梅脯有佳者百里必

懷致之母死終身不履梅下嫂氏孀居商霖事之如母試必擇官有貪墨者輒恚勿就試流寇之變日炯投湄池江死商霖作詩弔之尋入化成山中亦不食七日死衣帶間藏片紙云率土之濱莫非王臣詎云庶士可以偷生時年四十有七

張鵬翼 闕

吳愷 闕

周于德 闕

鄺引昌 子 尚英 浙江通志 字叔典山東沂州同知

隨征湖廣遷判永州府賊騎圍城城陷引昌及妻

黃氏季子尚英悉死之事

聞贈湖廣按察司僉事

賜祭奠廕一子

宣德仁 浙江通志 中順治辛卯武鄉試授蘇州衛

尉歷陞湖廣都司康熙戊辰督標裁兵據城鼓噪

倉猝莫禦德仁死之章志字元儒號靜菴辛卯舉

順天鄉試迭蘇州衛尉轉漕者六馳驅一十三年

言皇朝三
卷三十一
陞江南長淮衛守備長淮屯地被佔丁缺于精德
仁詳憲具

題清丈得地四百餘頃諸丁感德立碑建祠八年陞

山西掌印都司適蒙古飢

朝廷發倉賑之時大同亦飢兵民洶洶莫知所措德

仁白撫軍各捐俸資為食於路以待飢者兵民得

免道殣後補湖廣掌印都司任五載除奸剔弊聲

稱藉甚戊辰五月二十二日督標裁兵據城鼓噪

勢甚猖獗倉猝莫能禦時糧道葉映榴署藩司事

德仁潛至藩署曰援兵未至庫項已空不能殲滅

醜類惟有以死報

國耳竊定而歸其月二十六日夜傳武昌左衛守備

沈天澤昇以印屬之潛馳隣省呈繳遂死於難奉

詔賜祭葬加贈副將一子廕官

論曰臣無二心天之制也然而治平則公卿鴛鴦

世變則蛇豕鴟獍蓋死生之際亦大矣非死之難

處死之難苟得一二殺身成仁之士固宜前史以

為美談後來仰其徽烈者也抑聞歲寒知松栢世

言聖學六
卷三十一
八
變識忠臣吾暨死節諸公有不盡然者蔣御史備
亡軀於英主鄺僉判宣都司乃殉節於
盛朝此殆有幸有不幸歟念惟
聖恩高厚

賜之祭奠廕及子孫是又所謂死賢其生者其垂芳竹
帛有以也前此則胡公尚矣今學宮中猶專祠祀
之固知不愧儒臣其素所自樹立使然也若楊參
軍之殉死於宋史無所考而載在舊志亦已久矣
語云食人之食者忠人之事如何朱姚傳諸公則
祿食不進其口而分死不回不以不顯而廢忠蓋
又其難也夫忠孝之理所趣不同而究歸則一故
蘭桂異質而齊芳詔武殊音而並義向非母命見
許即傳公方進退維谷耳古稱范滂有母豈不信
哉
沈椿齡

諸暨縣志

卷二十三

循吏 人物二

一行作吏弛其負擔民之父母我何以堪心勞撫

字寶以不貪膏懷郇伯棠敷召南列循吏傳第三

宋

黃宋卿

舊志字公輔贈衛尉振之子初為翁源主

簿遭歲饑民聚為盜先是縣有銀錫之利禁民勿

取宋卿縱使採之盜遂止息元昊之亂獻策進討

仁宗納之名試舍人院擢第一歷著作郎知洪州

言登鼎六 卷三十三 奉新縣終比部員外郎皆能舉其職子渥廣西提

刑

朱戩子常 舊浙江通志名宦傳元符中知青田子

常復知是縣興建學校崇獎儒業父子繼美邑人

稱之

姚宏 萬歷紹興府志字令聲少有才名呂頤浩薦

為刪定官調江山令適歲早有巡檢自言能以法

致雷雨試之果驗民告妖術秦檜以私憾下大理

竟死獄中隆慶駱志初宏未仕時有僧妙應者知人休咎語宏不得令終端午日伍子胥

廟見榴花奇禍至矣以是監稅於杭足不登吳山將赴江山轉越謁師憲出城值大風雨憇路旁小

廟見榴花盛開詢祝史云伍子胥廟乃五月五日也未幾罹禍

辨見姚舜明傳

王琰 於越新編字剛夫其先臨川人父榕為諸暨

令遂家焉由分寧尉累遷知衢州所至有政績胡

銓嘗薦之曰治經有行亞西漢之名儒悃悞無華

寔東都之循吏識者以為確論萬歷紹興府志兄

行業與琰齊名城子厚之在儒林傳

趙令詔 浙江通志宋宗室世膺之子兩知紹興府

有惠政卒葬諸暨之龍泉鄉子孫因家焉

宋濂周節婦傳

令報從高宗渡江南居越諸暨遂為諸暨人

鄺元亨 舊志原籍維揚父翰林學士文紹扈駕至

越元亨以孝廉授諸暨學正著書講學崇雅黜浮

一時人文蔚起秩滿致仕遂卜居焉今為巨族

明

王孟暉 萬歷紹興府志名揚以字行初知泗州奉

公約已教民耕作飭勉諸生視其雅懋者傾身禮

之最聞擢知鞏昌坐謗謫瓊州同知縉紳投荒裔

者多跋足待滿而已暉獨盡心修職其所舉行無

一不切中人情又喜廉察有風岸瓊人至今稱之

方自新 紹興府志名暉鎰曾孫洪武末以孝行舉

授齊安驛丞擢石首令在邑以寬化民有懇告進

而兒女語之民至牽令裾相爾汝勿加咄叱會民

負逋上官督責旁午掠無完膚自新憫之召耆老

富民諷諭之乃先出俸為倡竟得米萬餘石為民

代輸餘九百石儲為義廩自是荒歲有賑流徙復

歸者三百户石首仍陋俗不知喪禮自新為陳孝

感之義戒以法制民乃遵用其教洪武三十年遣使覈海內徵需實數郡縣冊稍謬輒得罪石首舊牘無稽自新亦就逮父老相率走京師請貸不報竟隸作所明年廷臣言石首有異政所坐甚輕遂宥之超拜鄖陽守郡遭旱蝗逋租十餘萬石民至死無以償乃上章乞入楮幣代租上從之上津竹山二縣土瘠而民貧科繇乃與壯縣齒自新為奏減租稅之半未幾中原構兵中使四出督轉輸括兵器問閭騷動自新以郡當瘡痍之餘不忍重困請自繫中使初愠而終義之凡所賦得減他郡者績北上至龍江卒鄖陽人哀之如喪慈父

鄭宏 宏治紹興府志字仲耀永樂初以明經判安

慶府改饒州陞南安同知所歷皆有善政饒民以燒瓷為業故多官府造作之所宏嘗監督其事忽值窯變瓷器皆成異色守者將以上聞宏謂任土作貢不强所無倘因適然而責其常然後將何以應遽毀之民立祠窯所以報德

馮謙 浙江通志字履吉正統舉人歷教新安陽信

遷知沛縣縣當津衝民力疲於迎送謙力為裁節
邑有戚畹莊梨木廠為民大厲皆奏罷之又浚昭

陽湖建飛雲橋民賴其利子珏以文學稱歷官員外郎

徐琦 浙江通志字廷振正統舉人授崖州知州崖

民多黎戴竹笠子垂髻來見琦諭以服色當從中

國為易方巾直領之製簡率俊秀使趨於學教以

昏喪禮俗為之變在崖九年改道州知州政復報

最致仕紹興府志琦四歲而孤十五補弟子員遊宦幾二十年歸老好禮教義人稱長者

蔣憲 浙江通志天順年選貢入京任湖廣應山縣

知縣時民未知耕憲為犁教以耕婦不知紡憲為

制紡車教以織應山民自此饒富

陳祥 舊志字逢吉由歲貢任臨安府推官錄經史

恤刑者數百條貼座右為官箴政尚寬平郡人解

磁器供上遇風失水有司俱擬重刑祥以非其罪

釋之免死者三十六人

陳翰英 隆慶駱志字廷獻景泰癸酉舉人官南雄

府同知時流賊犯境翰英身率民丁據險設奇斬

獲數百民賴以寧郡境傳有紗帽石為崇翰英以

火烈之人服其正引疾歸田年九十卒所著有記
遺集

駱瓏 駱問禮先太守公傳字蘊良第進士任安陸

司馬州固巖疆瓏下車即建白盧沱河泊等浮稅
悉蠲除之治屬襄陽孔道藩封租逋武當香供中
使頻經磨牙橫噬瓏剛柔兼濟惠澤旁敷聲著循
州卓後陞粵東潮州守潮固昌黎伯所憇教化凌夷
弱肉強食其弊種種瓏作諭俗詩以鼓秀髦文童
政蹟彪炳嶺海三年報最例授江西副憲乞假歸

省遽爾屬續

趙有仁 舊志字德洪號雞山嘉靖中由經歷陞趙

府審理正趙府有獄其人慮以富累奉有仁以金
二千有仁曰若本無罪賄乃罪也予而受金子亦
罪與其兩罪何如兩無罪之為得也却之仍出其

獄

陳鶴鳴 陳于朝先太父墓誌字子聲自號聞野游

太學以資領南北軍參軍除外得揚州幕揚州當
東南都會鉅俠大姦往往舞文法羣盜復從橫江

淮上下鶴鳴至數月吏民稍稍累息奉令甲盜相
 戒無入揚州疆其地多大賈率用監鹽侵牟作神
 姦殆不可搏景沃饒之區以江淮溢而硤陘錯出
 爭以田賦相詭及鶴鳴視事鹽筭益裕吏胥無敢
 溷獻程癸未歲大祲遠近有捐瘠鶴鳴受命發賑
 立法甚善全活數萬會徐邳河決撼祖陵有司發
 卒數百萬治陂障授吏數百萬緡董其役時已遣
 他吏當事者走白司空潘季馴潘曰胡以反舍陳
 君也亟奪他吏檄授鶴鳴既落成省撤費可萬金
 吏請持歸不聽盡畀以報司空并陳方畧為築閘
 范稻河果為百世利鶴鳴乞歸以子貴進通奉大
 夫卒年七十有八

謹按潘公治河為千古一人陳為潘公許可
 是亦所謂附青雲之士以垂名于後世者也

陳善學 補遺字淵止萬歷壬子舉人選授五河知
 縣五河乃善學從曾祖父元魁舊治遺愛在人善
 於學復多惠政人稱濟美時白蓮教熾善學聞其軍
 資悉備乃秘授方畧刻期舉事擒殲渠魁餘黨遂
 散五河地卑患水善學相其隰原築堤疏流水不

言登鼎六
卷三三
為災後陞廣德州知州丁內艱歸遂不起

善學孫
菴文集

已失所刻有楊鐵厓先生古樂
府咏史及鹿則遺音

姚一鸞 章志字孟喈號象先萬歷乙卯舉人授西

安教諭日進諸生討論經義三衢稱盛學宮傾圮

一鸞為倡率改造數月落成陞英山知縣英在萬

山中地瘠民貧賦繁役重屬水漲湮沒民田征輸

如故一鸞為請於上得允豁免治英惟以撫循為

心緩於催科至終歲不一動刑民亦輸將恐後滿

三載乞終養歸

楊肇泰 章志字六符萬歷己未進士初授靜海

寧兩縣有政聲陞刑戶二曹主事房師黃白安領

袖東林欲薦為臺省時魏瑞柄國以親老辭出守

武昌丁艱服闋補安慶守會流寇猖獗隣郡皆陷

肇泰設法扞禦雖元旦守備不輟賊以肇泰賢守

相戒毋逼堅持六載以病乞休肇泰善藻鑑如史

閣部可法金侍郎聲皆出門下課試首拔者如高

爾儼呂纘祖俱順治初作宰輔家居後積穀備荒

戚族賴之捐祀田并三黨田以千計

郭元佐 章志字含冲以明經授汀州訓導士風丕
 振陞柳州雒容令招佃開墾起冤宣滯人稱良吏
 攝象州篆州多徭患數梗不服元佐置堡設兵恩
 威並用洞頑悉化轉思南同知委攝府篆復多惠
 政及歸里官橐蕭然

國朝

蔣爾琇 紹興府志字玉秀順治丁亥進士授河南
 原武知縣鋤強剪蠹不遺餘力撫軍允得時甚器
 重之卒以不畏強禦罷官歸里方初第時浙疆未
 靖土氛四起爾琇躬率鄉勇討平群逆四境賴以
 乂安

孫紀 章志字印元由太學生授福寧衛經歷詰贊
 兵戎修明保伍姥山瀕海寔賴以安以功擢郡司
 馬告歸

駱起明 余縉駱念菴墓誌字子旭號念菴生而穎
 敏族兄給諫纘亭先生垂老一見輒器重之曰是
 將大振吾宗者弱冠為弟子員慕叢山劉忠端公
 講學躡屨從遊深悟致知之要丙戌登賢書就慶

元學諭旋陞直隸雞澤令以註誤謫靜寧州倅明
敏果決守以下皆敬服之嘗釋寃獄十有七人已
復貴定令改永春邑故僻饒前此寇氛兵燹徵求
殫竭陋例相沿小民如處沸釜起明至即條上十
苦盡除積弊凡政有裨於民者知無不為尤勤於
作士季課月試所識拔聯飛者八人以倦遊乞歸
撫軍勉留再四士民皆攀轅泣請牘凡十餘上始
允宦橐蕭然一寒士也作文自擬韓柳書法顏米
二家居常徜徉巒壑溷跡漁樵自號楓林釣叟所
著有自怡集雁字十三章甘露亭八景詩開迷歸
正集行於世

章平事

公舉事實字大脩號無黨壬辰成進士出

黃岡劉子壯之門初刻懶名齋文稿劉序之謂以
性情開聖賢生面如禪家後逼拶中出不獨以矯
矯離奇擅一時之名也迭除得河南永寧令永寧
大家敗法負民穴居不聊生平事悉心撫字務使
安集勢家有欲甘心於僕者陰令人囑之欲與重
議平事不可曰罪不至死豈以一命博一官乎第

杖釋之勢家拂然直指清兩河田賦平事曰此特
豪強隱匿耳剔釐不稍假勢家益啣之卒用是免
官未幾按使

特疏起復官諭余恂亦勸之仕平事曰僕二老同登大
耄在官當告歸况復出乎遂終養家居四十年益
肆力於古稱極博所著有受齋堂集前此康熙中
邑令蔡杓奉檄纂脩縣志平事主之今稱章志

錢洪表

公舉事實字景明號雁湄大父時萬歷丁

未進士歷任至山東副使父芳肅副貢生俱自有

傳洪表中順治丁卯鄉試授山東清平令前令關

扃過嚴民情多壅洪表一切屏去曰此心如重門

洞達須使人人皆見耳清固屬邑地與隣邑相錯

籍久散失告牘山積莫能決洪表蒞任即請清丈

以剔弊竇犯星冒霜櫛風沐雨經畧就理課額始

定時大軍南征縉挽船隻動經民夫萬餘軍令遲

悞者斬必先期集禁以俟民甚苦之洪表悉縱使

還家約如期至及期果一呼而集溢額數千豪右

甯某父子濟惡戚屬據津要助其焰洪表廉得之

立置之法劇盜崔廷玉號截道虎橫行鄉邑白晝
殺人吏莫敢誰何洪衷以計捕得立斃之羣盜屏
息及去邑民思之不置建祠魏家灣祀之

壽佺 公舉事實字純菴康熙初以貢生任福建漳

浦丞署縣事時同郡姚啟聖為總督與佺故交方
燕見授以小東曰辨此歸資足矣佺視曰辨此必
多殺殺人得資佺不為也姚曰吾特試君耳遽焚
之計其中全活以千計後佺以子致潤授翰林院

檢討贈奉直大夫

子致潤傳列文苑致潤傳列後

余毓澄 公舉事實字靖淵號退菴侍御縉長子也

康熙壬子拔貢生乙卯舉於鄉士戌成進士除湖
廣龍陽令始抵任設園櫃以授指陳擇其可者立
見施行翦蠹除莠咸以濟恩比年俗革邑尚鬼傳
有羊崇毓澄禁之有邪術能寄形脫械者煽惑甚
眾毓澄廉置渠魁於法餘黨乃散任五載宿弊一
清邑遂稱治引疾告歸隱居楓溪之上享林泉之
樂三十年興到賦詩真樸淡逸雅近斜川所著有

心遠堂集

樓績公舉事實字爾成號青城中康熙庚午科浙榜選授直隸良鄉知縣縣多貴莊劇役民苦之潛亡他境績至痛抑豪強一意拊循每當役興爭之上官有不得爭者輒以身先上官亦鑒其誠多為罷之地嘗設有敲水兵千餘當事者惜以一時之役糜終歲之帑去其籍而移役於瀕河部民良鄉亦在部中受役書時隆冬冰堅當事督役甚急民皆執杖僵立水中績謂民未嘗親其役于事不習強驅之必多死爭之不得即洗足執杖下水當事者遽止之役亦遂息在縣七年折獄必得其情民以無冤囹圄亦為之空隣有囚路出良鄉寄獄廬蓋已錄為大盜論死明日且赴法曹對簿績廉知其枉請留鞠之不可請益力法曹怒責捕真盜乃聽出不爾罪且及績從容前諾之不踰時果捕得真盜出其囚於獄一時稱為神君先是有盜十餘人夜入其署發篋見敝衣數事厨無餘蔬嘆息而去廉聲因之益播良鄉民愛績如父及解任民膳之及卒民祀之

楊三炯字方榮如揚南喬先生傳字千木一字南喬尊甫存園以理學鳴著書滿家三炯畧皆上口既冠補諸生充康熙乙酉科鄉試再試春官會河留衍溢有言三炯才者因署試河吏為江都丞遷判高堰遂署知山陽縣兼內外河判丞尋陞郡丞督漕運凡六任不離河擢山東兗寧河道方丞江都時有豪家奴奪民妻為婦有妻者直之官更數牒皆度閣不理三炯以耳目庶得之械其奴三水囊頭肆諸市立載其妻還故夫豪家熟視無如何也及判高堰河督某公有紀綱之僕曰崔三巡校高堰諸役工搖唇一發能令公喜怒以是人畏其口招權催金錢無算坐自貴大平揖監司其視三炯羸然判也則益藐之三炯怒而批其頰一搥掌血泣而訴諸河督河督亦未有以難高堰歲一修然率以芟葦三炯謂此特取過目前耳將為之計深遠非石楨不可大吏據以

上聞乃別置馬子鞍分殺水怒而於堤上置石子堆備倉卒取土之難又為月塘堰旁萬一堰決權以塘

抵其衝使得便於搶築其策皆三炯發之其視事
究東道也書役凡數千人春秋間例有餽三炯怪
之問故吏吏曰此非真書役皆豪子弟掛名簡端
以辟他徭者野人斂芹所以報也三炯曰賄以免
徭則徭者胥窶人子矣不平謂何且彼既賄而掛
名終不肯但已將見事風生取償焉而官既入其
賄勢不得復呵問是交手為市也卻其餽平其徭
且為厲禁以示後人以歲計之斥去者蓋萬餘金
云相國海昌陳公時撫山東微行至濟州見獄囚
皆滿以委三炯不終日而畢方苞楊千木墓誌余
始得長沙陳公滄洲每為滄洲道三炯之為人及
三炯為河官而滄洲巡視南河以書來告曰楊君
信天下士也洪澤異漲水漫高堰沒蹠三炯使吏
卒更番撻葦茅以護堤而身督教之晝夜植立水
中凡四旬有七日民以安堵聲績自是顯著遷運
河同知擢濟寧道獄訟者爭赴焉廉使所司案牘
為之稀河濟間至今皆曰河官而兼民治實德在
人者惟閩中余公甸至楊公二人耳為河道歸匿

迹郊野朱相國領京畿營田思得能者自助予以

三炯對三炯聞之以苦言謝公今

天子嗣位搜括羣材有宿負者多見湔滌朱公暨余將

合辭訟言於

朝而三炯疾已沈痼矣卒年六十有七

壽致浦 公舉事實字雲濱號頤岩父佺任福建漳

浦丞多陰德年六十生致浦人謂異日當以循良

克肖亦如乃公任漳浦云致浦舉辛卯鄉薦癸巳

成進士知河南獲嘉縣甫下車即訪民隱加意

撫循時漕政方急致浦平斗斛權量惟謹民樂輸

將邑有更役火夫之需悉皆民間供應致浦力為

裁革諸如日用器物以及芻餉等費悉準時值採

取省費無算治獲數年兼攝淇縣其政績一如治

獲制府報卓異

引見 賜蟒袍一襲陞禹州知州始終一節政通民和人稱慈

母 傳學灝

公舉事實字兆漁號次淳康熙丁酉舉於

循吏

言良皇鼎志 卷之三 人物三 循吏 七
鄉雍正庚戌成進士分發湖南任衡陽知縣衡陽地廣事繁訟牒山積學灝多所平反必得其情民間鬻田宅者價昂輒取贖受鬻者慮其然輒浮價易券學灝察其情偽不使稍蒙訟日以少民俗輕生欲害人多飲藥自殺學灝準情附律民皆自愛凡任六年致仕學灝精於衡文先是雍正己酉例取隣省舉人進士未入仕者充同考學灝分房間闈及任衡陽分房楚闈者二所得皆名士如劉編修元炳胡庶常師孟方員外鳳陳郎中朝礎皆出

門下

楊侯 公舉事實字素鑑號亦厚從父三炯為河官侯與辦河務甚結練乾隆四年河院東軒高公以侯久於河務委署淮安海防同知明年

題署中河通判越五年三韓白公

題授徐州邳睢同知中河為漕運要區侯蒞任五年蓄洩以時糧艘商船通行無滯其支流曰鹽河設壩以經啟閉會汎水盛漲侯恐運河高支流漸低下注則東安海州盡遭淹沒因增築鹽河壩日夜

言聖皇志
卷三十三
防護親督兵丁於風雨泥淖中旬餘始定鹽河之
支流曰武潭河亦設壩居民利啟鹽運利塞主者
各執其私供集牧令約曰商民皆

朝廷赤子豈容吾輩岐視耶立水準涸塞盈啟商民均
受其利邳睢署在舊邳州署左有孔子廟久圯僕
鳩工重建廟貌復新蒞邳睢三年兼轄黃運湖河
工程遼遠修守紛繁僕精心籌畫先事預防境內
得寧凡在河九年兩

引見
特授常州府知府僕益以清操自矢惠山舊有水通以
供太守茗事僕曰到來只飲官中水豈可以遠致
百里勞我民哉竟卻之及去常乃為文質神以告
無私奉

命仍回河工中河水溢隨河院搶築復委銅沛同知事
卒官

翁維寧 **公舉事實**字集河蘇東崖由監生補寧夏
鹽課司大使時商吏舊以私匿鹽井百二十口一
井私錢十千維寧廉知之揭上憲司革去陋規鹽

政遂肅巡撫劉于義

題署武威縣事實授永昌知縣俗剛暴多輕死訟不平輒上絕壁投崖下名曰跳崖維寧理喻之許擊鼓以聞立雪其寃地以溝水資灌溉遇旱輒闢死維寧為作限田法計畝分溉訟以稍息邑連番酋界放牧番境即匿沒維寧與其酋長約各無私庇邊境以和

論曰前漢書列循吏六人後漢書列循吏十有一人晉宋以還或稱良吏或稱良政大畧從同以吾暨一邑之良當古史中一代之吏乃不啻過之不可謂不盛矣夫善政之於民猶良工之於埴也用功寡而成器多故東里相鄭西門治鄴潁川黃霸蜀郡文翁建績同而設施異莫不有因時制宜之道焉若以古化治今民以今吏撫前俗恐亦遷地弗良也如志所列人名一方治各一術著其績用之最章章者表而出之家有賢良人稱能吏庶幾哉名前杜後蕭規曹隨治縣私一家之有譜不其徧夫換縣因兩令以稱優方茲茂矣

沈椿齡

嘉泰會稽志字廷輝進士宣和二年盜發

睦州連陷杭睦衢婺處歙六州以舜明通判婺州

兵數千人穿賊境以入郭晨登義烏門治城壁飛

矢雨集舜明新率從兵以石擊賊既而引兵出戰

邀彼荒遐狡焉思肆有赫茲威一矢加遺馮燾於

門雷車電幟克壯其猷師干之試列武功傳第四

諸暨縣志

卷二十四

武功人物四

邀彼荒遐狡焉思肆有赫茲威一矢加遺馮燾於

門雷車電幟克壯其猷師干之試列武功傳第四

宋

姚舜明

嘉泰會稽志字廷輝進士宣和二年盜發

睦州連陷杭睦衢婺處歙六州以舜明通判婺州

兵數千人穿賊境以入郭晨登義烏門治城壁飛

矢雨集舜明新率從兵以石擊賊既而引兵出戰

賊遂大潰又賊帥洪載衆四十萬據處州不下舜
 明訪得其母妻令載所厚范淵往諭載即解甲來
 降除直秘閣提點兩浙刑獄建炎三年除知江州
 兼本路撫制使李成擁衆三十萬至城下舜明布
 列將士晝夜接戰賊衆斃踣不可勝記又開關奮
 擊生擒其將王林等賊攻益急舜明輒以計襲破
 其營復克江淮荆浙都督府隨軍轉運使曹成馬
 反據湖湘間反側未定命舜明往招撫遂以二賊
 入朝韓世忠劉光世駐軍江上朝廷以舜明計臣
 俾置司建鄴以總經費調發犒賞百須以給可間
 除集英殿撰提舉江州太平觀進徽猷閣待制卒
 萬歷紹興府志累階中大夫文安縣開國男贈太
 師所著有詩文十卷奏章三卷補楚辭一卷子宏

寬憲

宏載循吏寬載儒林憲載名臣

隆慶駱志其先自刻來遷萬歷紹興府志林按姚氏父子舊志皆云嵯人而諸暨新志乃云暨人且言墳墓子姓具在當必不誣然以兩邑鄉賢祠考之嵯及暨並祀舜明而寬及憲則但祀於嵯豈舜明初居暨而二子遷於嵯耶

謹按舊志載台輔坊為宋叅政姚憲所居府志載宋待制姚舜明墓在長寧鄉子樞密憲墓亦在旁

言聖果六
居與墓皆在暨憲
亦未始由暨遷嵬

孟載 兩浙名賢錄鄒國四十八代孫高宗時扈駕

南渡授環衛上將軍卒贈太尉家諸暨夫槩里

張定 吳萊張定傳張定者諸暨人初為武學優等

賜第後軍建康歷清流潛江令

浙江通志定從軍建康時清流有燈

寇屢征不服定建言寇本良民撫字失宜因而端作亂願往降之遂使攝令入洞降寇五十餘人

平間史嵩之制置荆湖孟珙帥軍夾攻蔡州奉香

朝謁八陵定以受給錢糧從守鄧州時河南始通

豪傑義士歲食官廩者僅萬人及兩淮進兵改湖

北制置司計議官出江陵措置邊防團結水寨權

守峽州將羸卒萬餘對壘生擒回紇頭目夷梓公

奪馬五十四騎俘數千人遂以功換閭門宣贊舍

人知泰州累疏論清野利害不報去職復江東總

管建康駐劄兼沿江制置司計議官召守融州廣

西經畧司言左右江有警融據其衝欲調外軍定

曰本土自有峒丁疑丁耳目便捷器械銳利若能

團糾調用皆精兵也可以應敵外軍懸入不諳水

土惡弱不熟谿洞險阻無適於用坐受罷黜乃大

置酒教場亭上鳴鼓一呼萬甲蟻集經畧司聞而
大驚遂劾罷之吳潛當國起知通州改守德安府
開慶間賈似道開都督府定往謁曰德安地小不
足展布四體勢湏假吾一命圖得要領歸報幕下
會北兵十萬越閩嶺而東別屯黃陂陽臺定亟言
德安城壁卑陋合盡徙居民保漢陽都統制劉炎
遽引所部禦之陽臺矢下如雨兵猝不得進似道
命移德安治吳王磯頭定曰兵法先發者制人後
發者制於人今幕府無先發之兵而德安移治彼
進我退異日將無地投足遂單騎詣轉運使趙葵
稟議曰夫南人貴舟北人貴騎今聞北兵更用舟
師鄂漢兵單弱不敵宜亟圍捕魚湖船虛張旗幟
部令不測使出沒炫耀江北洲渚間則大江徑渡
之謀可少戢也不然一旦渡江復以鐵騎蹂我鄂
漢必危葵怒曰長江天塹北兵豈易渡哉君郡守
知不離德安一步言及鄂漢何脅也定曰德安小
郡鄂漢荆閩要害今北兵破沙洋泊陽羅洲掠取
漁船斲改鞦韆且暮斧斤不絕整兵練衆意在渡

江萬一舉鞭徑渡東南關動吾豈獨受誤國罪哉
蔡怒愈厲曰漁舟如葉江濤渺然我轉運使也毋
欺我定力爭不已曰事勢至此謀議不信嘻吾死
矣已而北兵渡潁潢洲蔡遂殺定定死鄂漢大抵
陷沒如定言

為說者曰予嘗到諸暨過定所居處得墓隧間故
碑刪為傳方史孟之夾攻蔡州蔡下故所失地歸
我子女玉帛悉輦而趨北朝廷持其議曰今幸得
一空城是徒有受地之名而又無兵無糧以實其

地終亦不守史與孟皆報罷北兵復起於是趙葵
許戡等出軍河南大兵迎敵我軍隨潰遂割唐鄧
海泗以請和當是時定守鄧州竟無與成功者已
而襄樊破鄂漢有警磨此善聞之兵又擣貴象奪
辰沅長沙取潁潢北渡與鄂漢兵合丞相賈懼開
督進戰遣使乞解而定復為之用且欲彷彿乎荆
軻秦武陽之遺風非其道矣自是北兵南下由鄂
之沙洋攻陽羅洲直渡江至鄂南門丞相賈統兵
扼蕪湖孫虎臣前鋒對陣夏貴挾戰船二千五百

橫亘江中丞相賈將後軍殿亂射北船執縛邏騎
且挑戰北兵集將樹砲擊其中堅雷鼓大振呼曰
宋人敗矣丞相賈即倉皇失措舳艫簸蕩乍分乍
合北兵麾小旗率輕銳橫擊深入殺溺蔽江圖籍
印符悉已遺失軍資器仗狼藉不可勝計丞相賈
東走揚州孫奭並降當是時定言悉驗然定死已
久矣或曰蔡與賈不協故置定死地或曰定使間
到北欲翻滎陽城誘覆其衆失期一日故棄城出
奔蔡殺之也或曰賈至鄂許納歲幣而北兵退復

有陰謀懼洩故欲殺定託之蔡也嗚呼當滄海橫
流之際人材國勢一至於此豈不重可哀憐也哉

楊賢舊志甲辰進士知武義縣歷陞靖江節度使

屢建軍功娶吳氏為憲聖慈烈皇后甥女以戚畹

追贈中山王

隆慶略志
見質實篇

元

楊實浙江通志字國華明經通武畧補州弟子員

萬歷紹興府志累舉進士不第遂棄去築室
桐岡博綜羣籍攻苦食淡不饋櫛者十餘年延祐

間以耆儒徵歷知吉州軍事適寇犯境勢張甚實

募驍勇數百人躬為先鋒奮擊悉平之以功擢淮

南東路檢法萬歷紹興府志尋陞都奏進院檢試南宮號稱得人遷大理寺

丞

明

蔣貴正德諸暨縣志貴義安鄉三塘人明史本傳

字太富以燕山衛卒從成祖起兵雄偉多力善騎

射積功至昌國衛指揮同知從大軍征交趾及沙

漠選都指揮僉事掌彭城衛事宜德二年四川松

潘諸番叛充右叅將從總兵官陳懷討之募鄉導

絕險而進薄其巢一日十數戰大敗之進都指揮

同知鎮守密雲七年復命為叅將佐懷鎮松潘明

年進都督僉事克副總兵協方政鎮守又明年諸

番復叛政等分道進討貴督兵四千攻破任昌大

寨會都指揮趙得宮聚兵以次討平龍溪等三十

七寨斬首一千七百級投崖墜水死者無算捷聞

進都督同知克總兵官佩平蠻將軍印代政鎮守

英宗即位以所統皆極邊地奏增軍士月糧正統

元年召還為都督阿台寇甘涼邊將告急命佩平
將軍印帥師討之賊犯莊浪都指揮江源戰死
士卒百四十餘人侍郎徐晞劾貴朝議以貴方
迭軍甘州勢不相及而莊浪乃晞所統責晞委罪
置貴不問明年春謀報敵駐賀蘭山後詔大同總
兵官方政都指揮楊洪出大同迤西貴與都督趙
安涼州塞會勦貴至魚兒海子都指揮安敬言前
途無水草引還鎮守陝西都御史陳鎰言狀尚書
王驥出理邊務斬敬責貴立功貴感奮會朵兒只
伯懼罪連遣使入貢敵勢稍弱貴帥輕騎敗之於
狼山追抵石城已聞朵兒只伯依阿台於兀魯乃
地貴將二千五百人為前鋒往襲李安沮之貴拔
劍厲聲叱安曰敢沮軍者死遂出鎮人間道疾馳
三日夜抵其巢阿台方收馬貴猝入馬羣令士卒
以鞭擊弓韜驚馬馬盡佚敵失馬挽弓步鬪貴縱
騎蹂擊指揮毛哈阿奮入其陣大敗之復分軍為
兩翼別遣百騎為疑兵轉戰八十里會任禮亦追
敵至黑泉阿台與朵兒只伯以數騎遠遁西邊悉

平三年四月王驥以捷聞論功封定西伯食祿一
千二百石給世券明年代任禮鎮甘肅又明年冬
以征麓川蠻思任發召還京六年命佩平蠻將軍
印克總兵官與王驥帥師抵金齒分路進搗麓川
上江寨破木籠山七寨及馬鞍山象陣功皆第一
明年師還進封侯益祿三百石八年身復佩平蠻
將軍印與王驥討思任發子思機發攻破其寨明
年師還賞賚甚渥加歲祿五百石是役也貴子雄
乘敵敗帥三十人深入敵扼其後自刎沉於江贈
懷遠將軍彭城衛指揮使十四年正月貴卒年七
十贈涇國公謚武勇貴起卒伍不識字天性樸實
忘已下人能與士卒同甘苦出境討賊衣糧器械
常身自囊負不役一人臨陣輒身先之以故所向
有功子義病不能嗣以義子琬嗣侯累加太保兼
太子太傅卒贈涼國公諡毅子驥嗣再傳至孫
傳累典軍府加太子太傅明止爵絕

謹按蔣貴生斯長斯聚族于斯而其後隸籍江都
實暨人也其里居世系及發祥之阡吾暨及今猶
夫人能言之

錢時

章志字中甫號惺復萬歷丁未進士由常州

司李分較南闈得士為一榜冠以剛介左遷秦中

移商河令歲大饑時冒雪行阡陌稽口授糧全活

無算商河故盜藪往往劫掠城市時擒其魁治之

盜遂息遷工部主事權關蕪湖著有權蕪輯畧丁

艱歸服闋補原官未幾擢按察副使整飭上川南

道會奢酋犯順制府疏請用時專任督餉建議兵

運時為置頓舍均勞逸發邛波瀘飛輓千里兵食

以充陞左叅政備兵漕濮屬寇臨濮城發兵赴援

時厲卒直搗其巢盜用以戢旋罷歸優游書史著

來園集來清堂稿輯古文特抄四書類編行世子芳

肅自有傳
列孝友

論口昔人有言絳灌無文隨陸無武蓋言兼之者

之難也人才視國運為盛衰而文武恒不並著當

其盛時黼黻休明潤色鴻業文治隆矣及夫武功

之著必其在元黃野戰之日以故國運盛人才盛

而武功偏少國運衰人才衰而武功特多遇使之

然也吾登武功之赫赫者宗則姚太師有制勝之

才而不能保汴京之不陷張德安有料敵之智而不能使鄂瀟之不淪一木自難支噬臍且何及也明季率右文而左武故其未造將士多驕而不為國用若蔣武勇起家卒伍能歷險而披堅錢大參以文秩備兵能戢酋而弭盜三百年来僅得二人可不謂錚錚者歟自是而後乃竟無一人入志者

我

朝重熙累洽生斯世者目不覩金革之屬耳不聞鼓鼙之聲蓋天下之平久矣倚歎休哉沈椿齡

諸暨縣志

卷二十五

儒林

人物五

道隱未形德輶如羽乃如之人詩書義府顧惟後昆貽我高矩欲得其身必入其戶列儒林傳第五

宋

張堅

兩浙名賢錄字適道家貧篤學以聖賢自任聞胡安定教授湖州負笈徒步往從之旦夕研味至忘寢食不期年盡得六經之奧辭歸鄉里從遊甚衆後以八行舉得官尋改京秩貧不能給吟嘯

言聖鼎志 卷三五 人物五 儒林 二

自若時稱為醇儒 **萬歷紹興府志**字必先博學好古邃於經術

所論著有語孟發揮周易圖說孟子辨志麟經總

論春秋妙旨六經拍南諸史決疑暨陽雜俎浣溪

文集共二百六十餘卷舉紹興二十四年進士官

崇安令宗高宗詩不德作民主賢良在朕旁普天夫子鐸仙籍桂枝香昔日燕山寶今朝浣

水黃雁行常不亂衣錦好還鄉

姚寬 **寶慶會稽續志**字令威以父舜明任補官至

樞密院編修博學強記於天文推算尤精完顏亮

入寇中外以為憂寬獨推太乙熒惑所次為賊必

滅之兆亮果自斃上以其言驗名對移晷疾作仆

榻前卒萬歷紹興府志寬詞章之外頗工篆隸及

工技之事著有西溪集十史記注一百卷補注戰國

策三十五卷五行秘記一卷西溪叢語玉璽書萬歷紹興府志有古

樂府二卷擬樂府數篇俱超越漢魏

王厚之 **嘉泰會稽志**荆國王文公從孫厚之自臨

川來暨陽今為直寶文閣平生淡泊無他好獨好

聚金石刻又特精鑿故所得尤多自三代彝鼎款

識秦漢以降碑篆銘碣縣崖斷壁題字紀績收刑
 補缺整緝湮滅皆大備於所著復齋金石家世有
 右軍繭紙建安帖尤所寶惜常以自隨兩浙名賢
 錄字順伯乾道二年進士歷淮西運判改江東提
 刑進寶謨閣致仕平生好古博物尤著意金石刻
 文所著有金石錄三十卷考異四卷考古印章四
 卷題跋周宣王石鼓文後考訂秦惠王詛楚文精
 鑒絕識刻劃淺深戔辨無遺識者賞其博雅

陸唐老

浙江通志陸狀元唐老通鑑詳節一百卷

元

俞漢

浙江通志字仲雲精史學著史評八十卷春

秋傳三十卷象川集十卷進呈書付禮部頒行辟

為儒學教授不就萬歷紹興府志家頗饒歲飢出

粟五千石以濟貧乏後卒士友私謚之曰文惠

胡一中

父渭弟一貞

子澄

混從孫

學

萬歷紹興

府志字允文以進士補紹興路錄事著有童子問

序四書集箋定正洪範三益藁等集父渭字景呂

著有雞肋集第一貞亦善詩文有雪林小藁堯篋

小藁子澄登洪武中進士著有鷓鴣突藁混舉明經
從孫學俱彬彬有文有八咏見山水諸記

楊維禎 明史本傳字廉夫母李夢月中金錢墜懷

而生維禎少時日記書數千言父宏築樓鐵崖山

中統樓植梅百株聚書數萬卷去其梯俾誦讀樓

上者五年因自號鐵崖元泰定四年成進士署天

台尹 宋廉墓誌天台多黠吏憑陵氣勢仇官短長

為八鵬先生廉其奸中以法然其黨 改錢清場鹽

頗蚓結蛇蟠不可解卒用是免官 司令 宋廉墓誌時鹽賦病民先生為 狷直忤物十

年不調會修遼金宋二史成維禎著正統辯千餘

言 朱彛尊傳至正初修遼金宋三史成正統迄無

不在平遼與金統 總裁官歐陽元功讀且嘆曰百

年後公論定於此矣將薦之而不果轉建德路總

管府推官擢江西儒學提舉未上會兵亂避地富

春山徙錢塘張士誠累招之不赴 戴冠濯纓亭筆

蘇元主以上尊酒賜士誠士誠設宴以饗使者楊

廉夫與焉即席賦詩江南處處烽烟起海上年年

御酒來如此烽烟如此酒老夫遣其弟士信咨訪
懷抱幾時開士誠得詩甚慚
之因撰五論具書復士誠反覆告以順逆成敗之

說采彘尊傳書曰閣下乘亂起兵以獎王室淮吳
 不嗜殺一也聞善言則拜二也儉於自奉三也厚
 給吏祿奸貪必誅四也此東南豪傑望閣下之足
 與有為也雖然為閣下將帥者有生之心無死之
 志矣為閣下守令者有奉上之道無恤下之政矣
 為閣下親族姻黨者無制祿之法有奸位之權矣
 假佞以為忠託詐以為直飾貪虐以為廉最可畏
 者動民力以搖邦本用吏術以括田租銓放私人
 不承制出納國廩不上輸受降人而不疑任忠臣
 而復貳六者有一足以喪邦閣下不可不省也夫
 當可為之時有可乘之勢迄無成效其故何與為
 閣下計者少而自謀者多也維楨老且病爵祿不
 以干閣下幸承其言小可以為錢鏐大可以為晉
 重耳齊小白否則身犯六畏不有內士誠不能用
 變必有外禍始憶維楨言嗚呼晚矣士誠不能用
 也又忤達識丞相徙居松江之上貝瓊傳築元圃
蓬壺於松江之

上榜於門曰客至不下樓怨老懶見客不答禮怨
老病客問事不對怨老默發言無所避怨老迂飲
酒不輟樂海內薦紳大夫與東南才俊之士造門
 怨老狂

納履無虛日酒酣以往筆墨橫飛或戴華陽巾披
 羽衣坐船屋上吹鐵笛作梅花弄或呼侍兒歌白
 雪之辭自倚鳳琶和之賓客皆踟躕起舞以為神
 仙中人洪武二年太祖召諸儒纂禮樂書以維楨
 前朝老文學遣翰林詹同奉幣詣門維楨謝曰豈
 有老婦將就木而再理嫁者邪明年復遣有司敦
 促賦老客婦誥一章進御曰皇帝竭吾之能不强

吾所不能則可否則有蹈海死耳

元詩選注明太祖初即位遣韓

林詹同奉幣徵維楨維楨賦老客婦諱曰老客婦

老客婦行年七十又一九少年嫁夫甚分明夫死

猶存舊箕帚南山阿妹北山姨勸我再嫁我力辭

涉江采蓮上山采藤采蓮來藤可以療飢夜來道

過娼門首娼門蕭然驚老醜老醜自有能養身萬

兩黃金在織手上天織得雲錦章繡成頗補舞衣

裳為妾佩古意揚清光辨妾不是邯鄲娼同為作

老客婦傳維楨又有詩曰皇帝書徵老秀才秀才

懶下讀書臺商山本為儲君出黃石終期孺子來

太守枉於堂下拜使臣空向日邊回老夫一管春

秋筆留向胸 帝許之賜安車詣闕廷留百有一日

所纂叙例畧定即乞骸骨帝成其志仍給安車還

山史館曹監之士祖帳西門外宋濂贈之詩曰不

受君王五色詔白衣宣至白衣還蓋高之也抵家

卒 隆慶駱志洪武初召修集禮書抵京作老客婦

諱以見意或勸上殺之上曰老蠻子正欲吾成

其名耳遣之還松江 年七十五 鐵崖壙誌生元貞

卒此與明史不同 年七十五 鐵崖壙誌生元貞

茅山張羽錫山倪瓚崑山顧瑛為詩文友碧桃叟

釋臻知歸叟釋現清容叟釋信為方外友 見鐵笛道人自

傳 張雨稱其古樂府出入少陵二李間有曠世金

石聲宋濂稱其論撰如覩商敦周彝雲雷成文而

寒芒橫逸詩震蕩陵厲鬼設神施尤號名家云 宋濂

墓誌所著有四書一貫錄五經鈴鍵春秋透天關
禮經約君子議歷代史鉞補正三史綱目富春人
物志麗則遺音古樂府上皇帝書勸忠詞及
平鳴瓊臺洞庭雲間祈上諸集通數百卷
維楨

徙松江時與華亭陸居仁及僑居錢惟善相倡和
兩人既歿與維楨同葬于山人目為三高士墓

王冕 宋濂王冕傳王冕者諸暨人七八歲時父命

牧牛隴上竊入學舍聽諸生誦書聽已輒默記暮
歸忘其牛父怒撻之已而復如初母曰兒痴如此
曷不聽其所為冕因去依僧寺夜潛出坐佛膝上
執筆映長明燈讀之琅琅達旦佛像多憚惡可怖

冕小兒恬若不見安陽韓性聞而異之錄為弟子

學遂為通儒性卒門人事冕如事性時冕父已卒

即迎母入越城就養久之母思還故鄉冕買白牛

駕母車自被古冠服隨車後鄉里小兒競遮道訕

笑冕亦笑著作郎李孝光欲薦之為府史冕詈曰

吾有田可耕有書可讀肯朝夕抱案庭下備奴使

哉冕居小樓客至僮入報命之登乃登部使者行

郡坐馬上求見拒之去去不百武冕倚樓長嘯使

者聞之慙冕屢應進士舉不中歎曰此童子羞為

者吾可溺是哉竟棄去買舟下東吳渡大江入淮
楚歷覽名山川或遇竒才俠客談古豪傑事即呼
酒共飲慷慨悲吟人斥為狂北遊燕都館秘書卿
秦不華家秦不華薦以館職冕曰公誠愚人哉不
十年此中狐兔遊矣尚可言仕即日將南轅會其
友武林盧生死灤陽惟兩幼女一童留燕俵無所
依冕知之不遠千里走灤陽取生遺骨挈二女還
生家冕既歸越復大言天下將亂時海內無事或
斥冕為妄冕曰妄人非我誰當為妄哉乃携妻孥
隱於九里山種豈三畝粟倍之植梅千樹桃杏居
其半芋一區薤韭各百本引水為池種魚千餘頭
結茅廬三間自題為梅花屋嘗倣周禮著書一卷
坐卧自隨秘不令人見更深夜寂輒挑燈朗誦既
而撫卷曰吾未即死持此以遇明主伊呂事業不
難致也當風日佳時操觚賦詩千百言不休皆鵬
騫海怒讀者毛髮皆聳人至不為賓主禮清談竟
日不倦食至輒食都不必辭謝善畫梅不減楊補
之求者肩背相望以繪幅短長為得米之差人譏

之冕曰吾藉之以養口體豈為人作畫師耶未幾

汝穎兵起一如冕言皇帝取婺州將攻趙物色得

冕萬歷紹興府志太祖取婺州遣胡大海攻紹興也兵九里居人傍徨奔避冕獨不動兵執之則

曰我能為若師出奇計乃與俱見大海告以攻城之策太祖聞其人名與語頗合真幕府

授諮議參軍一夕病卒樵書云明兵攻城昇冕狀

貌魁偉美鬚髯磊落有大志不得少試以死君子

惜之

史官曰予受學城南時見孟案言越有狂生當天

大雪赤足上潛嶽峯四顧大呼曰遍天地間皆白

玉合成使人心膽澄澈便欲仙去及入城見戴大

帽如蓑穿曳地袍翩翩行兩袂軒舉譁笑溢市中

予甚疑其人訪識者問之即冕也冕真怪民哉馬

不要駕木足以見其奇才冕亦類是夫

謹按王冕萬歷紹興府志列儒林浙江通志載續高士傳列隱逸續宏簡錄元史列文翰明史列文苑今錄宋濂傳仍擬

字元章據續高士傳冕字元肅據續宏簡錄元史字元章號

煮石山農

陳涿隆慶駱志字文淵博學多才詞翰兼美白方

伯圭陳觀察璇文章論薦稱以學貫天人才堪經

言聖鼎志 卷二十五 人物五 儒林
濟銓曹忌之不果用史襄伯郭登南征辟置幕府
官至後府錄事著有湖海摘奇等集

陳大倫

續宏簡錄元史字彥理始學於從兄洙後

事吳萊絕意仕進元季避兵流子里作晚香亭日
與賓客暢飲高歌舉座絕倒嘗語人曰吾平生無
他嗜惟攻文成僻孳孳矻矻垂四十年昔之人如
此者何限今安在哉每搔首自傷識者亦共傷之
所著有春秋手鏡尚雅集浙江通志大倫初學易
既而更春秋敷繹義例評亮輒雲烟滿紙屢試場

屋不能中繩尺於是棄絕益攻古文詞浦陽吳萊
以奧學雄文名當代大倫從之講學下及秦漢以
來諸文章大家章有法句有旨青燈夜懸達旦不
寐學大進或酒酣捉筆咏詩脫帽高歌擊几案為
節或支筇行古石細尋字目思視意若與之相忘
髮已斑白手不釋卷其地理老釋之書莫不攬
其英華尤善寫竹畫蕭蕭有蒼勁意

陳潛

萬歷紹興府志嘗著詩經論辨朱子傳疑舊

志潛性嗜學不慕榮利學成受徒從遊甚衆每語

學者以立志貴堅窮理貴實

明

黃鄰 萬歷紹興府志字元輔性簡默工文詞居鄉

持重洪武初徵為翰林院典籍遷監察御史以老

出知杞縣道民興學政事茂雅尋告歸鄰嘗編次

縣志後人多本之云

郭斯厚 隆慶駱志字伯載父銳學識清遠著有闢

地理說非星術論斯厚篤行好學雅意經史洪武

中以名行補政和縣典史綽有政聲嘗作性論其

略曰大哉性乎非真知實得者孰能盡之漁父沒

於九淵獲覩驪龍之珠及其出而欲語諸人終非

寸舌百譬所能似也須真得其珠入於掌中斯為

實見矣其論貴實得類如此所著有星溪集及政

和縣志

駱象賢 萬歷紹興府志字則民篤行好學於書無

所不窺為文直述情事不求華緻嘗斟酌六禮之

要表率鄉俗鄉人化之為園於楓溪之上圖書滿

屋玩讀不輟人稱溪園先生歲飢出粟千石以賑

賜勅旌異仍復其家所著有羊束集篤終易覽溪園逸稿歸全集等書

鄭欽子天鵬 萬歷紹興府志字敬之成化中舉人

知澧州州多洞苗欽振威綏德民彞交安九載不遷遂乞歸繼母王氏患瘋疾晨昏省視無怠及居

喪哀戚尤至年八十六卒所著有思軒集子天鵬正德中舉人知弋陽文行足世其父而書法尤精

為時所珍手書告示往往為有識者竊去及歸老手卷不釋客至清談竟日瓶無粒米不問也年八十餘尚能於燈下書蠅頭細字所著有秉燭正譌

閩遊倡和北行野操南溟存稿諸集

駱驥 萬一樓外集字汝良號楮山以禮記中嘉靖

辛卯科鄉試壬辰科進士辦事刑部卒年三十有

七幼年讀書止四五行及長博通羣籍無不成誦為儒學生名重一時及辦事刑部應詔言時事大

略謂致中和則天地位萬物育災異所以頻仍皆緣中和未致中且指及大學士張孚敬時論壯之

而未究其用莫不嘆息大學士張孚敬向不識驥入朝私問孰為駱其人指

示之為之悚然且曰吾目中素空無人及觀駱子
 心動今果為所中矣先是從祖瓏歷官二十年未
 之識面及旋里一見器之謂驥父鳳岐曰諸嗣英
 英而邁種亢宗者四子驥也及廷對侃侃冰立鳳
 岐居家嘆曰吾兒向固循循書生今乃強項如此
 哉蘊良公之言信矣蘊良瓏字也語見駱氏譜傳
 亦續亭

先生撰
 謹按續亭先生墨守程朱其論理學往往與王文
 成公異趨故不之及非畧也據毛西河集王文成
 傳本云門人無成冊不能盡記其可記者尚有駱
 驥諸暨進士是驥固陽明弟子今以列入儒林豈
 復有異
 議哉

鄺琥 補遺 字仲玉 號元厓 姚江緒山先生 錢德洪

高弟子也以貢生任績溪簿其軒曰高士同邑駱

問禮為之記曰元厓子初與予同事緒山錢先生

時子方弱冠學為文詞而元厓子彬彬學已有成

與先生獨相得自後元厓子學益進不惟師友相

推重即自許亦以為得王文成正傳而予日淪落

且迂僻酷嗜宋朱文公而於文成之道謝不欲聞

然元厓子不以是棄予也每相遇必談論終日即

未盡合意相許可自後予落魄風塵而元厓子亦

小就為績溪簿中丞周潭汪公為題其軒曰高士

意以文公為同安簿曾以是名其軒而元厓亦為

言學集卷之五
是官授以贈之予聞入山者不探珠蹈海者不采
玉王文成詆疵文公不遺餘力元厓子既入文成
戶庭寧肯以文公為堂奧而中丞舉以畜之而元
厓子亦欣欣不以為怪其深於理學如此

之名非君子履道之極也君子之道平常而已率
其平常雖德如孔子業如周公不以高名後世所
謂高士皆商山富春之流然商山富春諸人能高
於周孔耶顧世方役役而彼獨危步遠引其與庸
亦遠矣凡言高者對卑而言也朱子身體力行其

非聖賢之實而願以此自名意有所在元厓子自
負其生平不在人後而卑卑一簿恬然居之豈役
役者比有志者必先去其役役使足比跡於古之
高士始可以共學而其所當適從終有所在此中
丞推挽之意而元厓子默飲其醇居之而不怪者
也予官留都元厓子以職事至留都事簡諸公多
論學者聞元厓子至皆以為奇遇願予固不入其
說人多嘔嘔而元厓子不以病予夫道無兩是入
者主則出者奴予自愧不免而元厓子獨異於是

此亦其高之一端云記語意欲以規然雖徑途稍別要以師門宗旨各有所承不得以彼一廢此一也琥在績溪著有和蘇集亦駱問禮為之序大畧言蘇文定為績溪時其詩句不讓大歷諸公而元厓所次更出新意良有不覺其喜談而樂道之者其後山陰徐渭復為之序曰今之和人之詩者非欲以凌而壓之則且求歧而及之未必凌且壓歧且及也而勝心一起所得者少而所失者多矣古之和詩其多莫如蘇文忠公在惠州時和淵明之

作今味其詞皆泛泛乎若鷗悠悠乎若萍之適相遭蓋不求以勝人而求以自適其趣而不知者誤較其工拙是猶兩人本揖讓未有爭也而眩者曰彼拳勝此肘負不亦可笑矣乎酈君之簿績也取蘇文定公之詩而和之多至百四十餘首其數幾及文忠公之於淵明其嬉遊傲睨而不屑於工拙亦猶文忠公之於淵明也蓋君之所負者大不得其大而試於小此所以不免於嗚嗚而負屑屑於工拙則適以成其小矣而豈君之意哉校君詩者

不識解此否有不解君當自解之也今和蘇詩不

傳存其序詩可知矣琥真理學中一高士矣哉子

希范字范叔工詩自有集亦駱問禮為之序駱與徐俱

以詩贈鄴並載藝文志

蔣一鵬 紹興府志字漢冲弱冠遊南雍大司成馮

夢禎異之名遂著著有文萃堂集言河漕兵農禮

樂最詳性孝友祖父兄同時即世終身哀毀每言

及輒涕泗交流弟侄俱幼恩勤備至而訓誡必嚴

孫遠康熙壬戌進士

蔣公允 紹興府志字士祿邑廩生好讀書終日靜

坐洞究理學臨沒語門人云息心違本原吾生平

得力在此

鄴洙孫光祖 紹興府志洙字白巖博古敦行萬歷

初講學於稽山書院一時佳士皆從之遊著有家

教輯畧紫陽家禮得其發明為多山陰徐渭志其

墓孫光祖字均儀弱冠有文名副於浙榜者再授

吳江丞轉知邵武縣廉聲藉甚嘗著範世全編定

性論四書本舌禹貢注等書吏治文章為世所重

太史陳仁錫撰其行畧邑令朱之翰題其居

朱長庚 紹興府志字與白萬歷己酉舉於鄉初任

遂安學博士人立祠祀之授桃源令調含山令撫

軍蘇某薦之曰愛民切如保嬰鋤強銳於拔薤以

耿介忤當道罷歸隱居巢勾山之嘯客堂藏書甚

富類多手評著有善生善死善意錄

國朝

楊學泗 浙江通志字魯嶧庠生幼穎悟讀書輒能

自解年十四喪父哀毀骨立三年如初喪母病以

鍼刺血書詞告天果愈里人稱曰楊孝子康熙甲

寅山寇盤踞紫閭學泗糾集鄉勇探其出沒適制

府以勦賊至暨密陳方略領兵報捷制府欲於疏

內議叙學泗以母老辭酬以金帛亦不受制府動

容起敬 紹興府志學泗所學以存誠主敬為本著

有道學宗譜義經講義性理約言朱子學的註省

身錄諸書崇祀郡邑兩學鄉賢

余懋棟 公舉事實字舟尹號蘿村毓湘子侍御縉

孫也食餼邑庠雍正己酉以選拔中式康熙成進

士除杭州府學教授任十九年致仕自懋棟任教
學中取解首者四鼎甲者三其他冠春秋榜者未
易更僕然立教必自羞乞墦賤龍斷始謂昌黎符
讀書城南一詩未闕至極以猶未免於富貴利達
之見也懋棟經學博行垞而理學斷以平湖陸子
為宗同郡魯庶常曾焜主敷文講席每與商確古
註疏及宋元諸書經解一許一支足稱堅對督學
寧化雷公臨浙招懋棟與論朱陸以鏡喻心之說
旁及高劉鹿孫諸前輩有醇疵處漏下三鼓乃出

雷公嘆曰余學博可謂明辨哲也造士先立品而
後文藝務以聖賢實學相期其為人溫和純粹論
者為比德於玉焉所著有揖山樓集蘿村詩稿制
義正續稿間中偶憶

論曰仲尼沒而微言絕七十子喪而大義乖及周
之季道術紛紛矣太史公曰儒者博而寡要勞而
少功儒術之疎自昔而然可勝慨與夫古之學者
博學乎六藝之文先聖所以明天道正人倫致至
治之成法也自班史始立儒林傳而易書詩禮春

秋各有專家歷代因之不改是儒林者大抵皆深
 於經術者也至宋史則深於經術者如聶崇義石
 介孫復胡瑗輩既以之列為儒林及周程朱子出
 不得復與並列也故別立道學傳以尊之抑豈儒
 外有道哉明儒如河東薛瑄餘干胡居仁諸君子
 其學直接程朱而明史則仍以儒林列之是儒林
 者又即其深於理學者也今志錄諸儒之尤者如
 宋之威王順伯元之楊鐵崖王元章明之溪
 園思軒儲山元厓諸人

國朝之存園蘿村二公或深於經或深於理或以經學
 而兼理或以理學而兼經考其終始要其會歸莫
 不異苔同岑後先濟美其揆一也夫輒視其所引
 繆視其所染衆好同趨則鄒纓齊紫且以易俗况
 邑多君子人懷善良其取則蓋甚便也生其後者
 可以興矣

沈椿齡

附錄

文獻通考姚寬令威待制舜明廷輝之子兄宏令聲
 為刪定官得罪秦檜死大理獄寬為六部監門逆
 亮入寇寬言木德所照必無虞言驗將除郎名對
 得疾仆殿上卒遂用其弟憲令則後至執政

謹按姚氏事跡不詳各傳錄之以見出身次第如此

揮塵錄姚寬著西溪殘語考古今事最為詳備

謹按西溪殘語一書亦載文獻通考傳未之及

慶元偽學籍

趙汝愚留正周必大王蘭朱熹徐誼彭龜年陳傅良薛叔似章穎鄭湜樓鑰林

大中黃由黃黼何異孫逢吉劉光祖呂祖儉葉適
 楊萬里項安世沈有開曾三聘游仲鴻吳獵李祥
 楊簡趙汝讜趙汝談陳峴范仲黼汪達孫元卿原
 燮陳武田澹黃度張體仁蔡幼學黃顥周南吳柔
 勝李直王厚之孟浩趙鞏白炎震皇甫斌危仲任
 張致遠楊宏中張衡周端朝林仲麟蔣傳徐範蔡
 元定呂祖泰
 凡五十九人

謹按王順伯厚之與朱子同籍錄之以補傳所未詳

文獻通考尚書左丞王安禮和甫近時厚之順伯其

曾孫也

謹按王順伯為王魏公曾孫亦傳所未詳者

卷之三